


明朝典彙

			九	漢
		一	〇	書
		〇	五	門
六	一	〇		
四	三	四		
冊	架	函	號	類

庫文閣內			
九	〇	五	漢
〇	四	〇	書
三	六	〇	
二	四	五	
架	冊	號	類

內閣文庫			
番號	漢	9205	
冊數	64 (5)		
函號	294	39	

五



國朝典彙卷之四

都察院右僉都御史

徐學聚 編輯

浙江蘭谿縣知縣

臣吳國琦 重訂

朝端大政四

登極迎立

淺草文庫

太祖高皇帝洪武元年戊申正月乙亥即皇帝位 上自

壬辰起兵歷十有七年至是文武群臣百司衆庶合詞

勸進尊為 皇帝祭告天地于鍾山之陽即位于南郊

定有天下之號曰大明建元洪武

上將即位以群臣推戴之意告于 上帝曰如臣可為生

民主告祭之日帝祇來臨天朗氣清如臣不可至日當
烈風異景使臣知之先是連日雨雪陰沍至正月朔日
雪霽越三日省牲陰雲悉斂日光皎然至行禮天宇廓
清星緯明朗衆皆忻悅

三十一年閏五月辛卯 皇太孫卽皇帝位詔曰天降下
民作之君我 皇祖高皇帝受天明命統有萬邦宵衣
旰食弘濟斯民凡事有益于天下者無所不用其心政
教休明規模宏遠朕以眇躬纂承大統恭依遺詔于洪
武三十一年閏五月十六日卽皇帝位夙夜祇懼思所
以克相上帝寵綏四方以無忝我 皇祖之大命永惟

寬猛之宜誕布維新之政其以明年爲建文元年大赦
天下於戲德惟善政政在養民當遵先聖之言期致雍
熙之盛百辟卿士體朕至懷

建文四年六月丙寅 燕王入京師諸王及文武群臣請
正天位丁卯諸將上表勸進戊辰諸王上表勸進己巳
王謁 孝陵還御奉天殿卽皇帝位

以卽位詔天下大赦詔曰昔我 父皇太祖高皇帝龍飛
淮甸迅掃區宇東抵虞淵西踰崑崙南跨南郊北際瀚
海仁風義聲震盪六合習爽闢昧咸際光明三十年間
九有寧謐晏駕之日萬方嗟悼煌煌功業恢于湯武德

澤廣布至仁瀾流姪允炆以幼冲之資嗣守大業秉心
不孝更改章憲戕害諸王放黜師保崇信奸回大興土
木天變于上而不畏地震于下而不懼災延承天而文
已過飛蝗蔽天而不修德益乃委政宦官滌佚無度禍
機四發將及于朕朕爲高皇帝嫡子祖有明訓朝無
正臣內有奸惡興兵討之朕尊奉條章舉兵以清君側
之惡蓋出于不得已也朕兵不舉亦將有聲罪而攻之
者允炆曾不反躬自責肆行拒旅朕荷天地祖宗之靈
戰勝攻克擣之于壩上殲之于白溝破之于滄州潰之
于藁城鏖之于夾河躡之于靈壁六戰而已不國矣朕

于是駐師畿甸索其奸貪庶幾周公輔成王之義而乃
不究朕懷闔宮自焚以絕于宗社天地所不庇鬼神所
不容事不可止朕乃整師入京秋毫無犯諸王大臣謂
朕太祖之嫡子應天順人天位不可久虛神器不可
無主上章勸進朕拒之再三爰俯徇輿情已于六月十
七日卽皇帝位大禮旣行所有合行庶政竝宜兼舉今
年仍以洪武三十五年爲紀其改明年爲永樂元年
永樂二十二年八月望日皇太子以嗣位遣英國公張
輔等告天地宗廟社稷躬告几筵卽皇帝位朝群臣大
赦天下

洪熙元年六月十二日 皇太子卽皇帝位命文武百官免賀免宣表止行五拜三叩頭禮遂頒詔大赦天下

宣德十年正月初十日 皇太子卽皇帝位詔赦天下

正統十四年八月 上車駕北狩戊辰報至京師已巳

皇太后召百官入集闕下命 郕王權總萬幾於午門

南面見百官啓事施行辛未 皇太后詔立 皇長子

見深爲皇太子時年二歲 皇太后勅諭 皇帝幸六

軍親征已命 郕王臨百官然國家庶務不可久曠今

特勅 郕王暫總其事爾各衙門大小事務其悉啓

郕王聽令毋致怠違衆疑行且卽真數日內外洶洶不

自保 皇太后乃復詔天下曰邇因虜寇犯邊毒害生

靈 皇帝恐禍延宗社不得已躬率六師往正其罪以

安國家不意被留虜庭尚念神民不可無主茲于 皇

庶子三人之中選其賢而長者某立爲 皇太子正位

東宮仍命 郕王爲輔代總國政撫安天下嗚呼國必

有君而社稷爲之安君必有儲而臣民有所仰布告天

下咸使聞知 丙子移 王座入奉天門左受朝

庚辰 皇太后遣太監金英傳旨 皇太子幼冲未能踐

祚理萬幾 郕王年長宜早正大位以安國家議者亦

以時方多故人心危疑思得長君以弭禍亂於是文武

群臣交章勸進

九月初六日癸未 郕王即皇帝位改明年為景泰元年

遙尊 上為太上皇帝

景泰八年正月 上不豫十七日 上皇復即皇帝位改

是年為天順元年

天順八年正月二十三日 皇太子即皇帝位以明年為

成化元年

成化二十三年九月六日 皇太子即皇帝位以明年為

弘治元年

弘治十八年五月十八日 皇太子即皇帝位以明年為

正德元年

正德十六年三月十四日丙寅 上崩于豹房先一日大

漸惟太監陳敬蘓進二人在左右乃謂之曰朕疾殆不

可為矣爾等與張銳可召司禮監官來以朕意達 皇

太后天下事重其與內閣輔臣議處之前此事皆由朕

誤非汝衆人所能與也俄而 上崩敬進奔告 慈壽

皇太后乃移殯于大內是日傳遺詔曰 皇考孝宗皇

帝親弟 興獻王長子某聰明仁孝德器夙成倫序當

立遵奉 祖訓兄終弟及之文告于 宗廟請于 慈

壽皇太后即日遣官迎取來京嗣皇帝位奉祀 宗廟

君臨天下又傳 皇太后懿旨諭群臣曰 皇帝寢疾
彌留已迎 興獻王長子來京嗣皇帝位一應事務俱
待嗣君至日處分於是司禮太監谷大用韋霏張錦壽
寧侯張鶴齡大學士梁儲定國公徐光祚駙馬都尉崔
元皇親邵蕙禮部尚書毛澄奉金符以行 初司禮監
官以 太后命至內閣大學士楊廷和等議所當立者
既定入白 太后取旨廷和等候於左順門頃之吏部
尚書王瓊排掖門入厲聲曰此豈小事而我九卿顧不
聞耶衆不答瓊意乃沮

戊寅遣迎官至安陸藩府 上候迎府外至承運殿行禮

開讀畢 上陞座藩府及州衛各官侍班乃進金符
上親受之遣迎官行朝見禮賞賚有差

四月壬午 上辭 興獻王寢墓成拜慟哭從官無不感

泣癸未 車駕發安陸 上不忍遽離 聖母嗚咽涕

泣 聖母曰吾兒此行荷負重任慎無輕言 上曰謹

受教駕行安陸民人老幼攀戀扈從內臣張佐戴永長

史袁宗臯指揮駱安等凡四十餘人所過約束不擾至

河南渡河有父老拏舟者曰昔 天子初生之年此河

清三百里者三日當時謂黃河清聖人出今果然矣

丁亥禮部員外楊應奎具合行禮儀途啓請如皇太子卽

位禮 上覽之謂長史袁宗臯曰遺詔以吾嗣皇帝位非皇子也所具云何

癸卯 上至京城外御行殿大學士楊廷和等請 上如禮部所具儀由東安門入居文華殿上箋勸進擇日登極 上不允會 慈壽皇太后有旨曰天位不可久虛

嗣君已至行殿內外文武百官可即日 上箋勸進于是魏國公徐鵬舉率文武百官軍民人等三上箋勸進

上受箋日中由大明門入遣武定侯郭勛告天地建昌侯張延齡告宗廟社稷 上親告 大行皇帝凡筵謂見 慈壽皇太后 武廟皇后 憲廟皇妃畢出御奉

天殿卽皇帝位遂頒詔以明年爲嘉靖元年大赦天下

上 興獻王長子 憲宗孫也弘治甲寅 興王受封之

國安陸州正德丁卯八月十日 上生于興邸是日宮

中紅光燭天遠近驚異卿雲見翼軫分野巳卯六月

王薨諡曰獻 上受勅嗣理國事至是年十有五矣

嘉靖四十五年十二月二十六日 裕王卽皇帝位詔以明年爲隆慶元年

國朝典彙卷之五

都察院右僉都御史

臣

徐學聚

編次

浙江蘭谿縣知縣

臣

吳國琦

重訂

朝端大政

五

遺詔顧命

洪武三十一年閏五月

上不豫乙酉召兵部尚書齊泰

受顧命輔

皇太孫

上崩於西宮壽七十一遺詔曰

朕受皇天之命膺大任於世定禍亂而偃兵安生民於市野謹撫馭以膺天命三十有一年憂危積心日勤不怠專志有益於民奈何起自寒微無古人之博智好善

惡惡不及多矣今年七十有一筋力衰微朝夕危懼慮恐不終今得萬物自然之理其奚哀念之有皇太孫允攸仁明孝友天下歸心宜登大位以勤民政中外文武臣僚同心輔佐以福吾民葬祭之儀一如漢文帝勿異布告天下使知朕意孝陵山川因其故無改諸王臨國中無得至京王國所在文武吏士聽朝廷節制惟護衛官軍聽王諸不在令中者推此令從事

永樂二十二年七月 上親征阿魯台班師已丑次蒼崖

上不豫召英國公張輔受遺命傳位皇太子且云喪服禮儀一遵 太祖皇帝遺制辛卯 上崩內臣馬雲

孟驥等以六師在遠外秘不發喪密召大學士楊榮金幼孜入議喪事逐一遵古禮含斂畢載以龍輦所至朝夕上食如常儀壬辰次雙筆峰楊榮與少監海壽奉遺命馳訃 皇太子即遣 皇太孫出居庸赴開平迎駕時京師諸衛軍皆隨征聚行在惟趙府三護衛軍留京師一時浮議藉藉慮護衛爲變遂秘未發喪 皇太孫瀕行啓 皇太子曰出外有封章白事非印識無以防僞 皇太子曰渠言良是但行急新製不及楊士奇曰殿下未踐祚有事自應行常用之寶其東宮小圖書可假之行此出一時之權歸即納上 皇太子即取付

太孫曰有啓事以此封識來此亦久當歸汝汝就留之
皇太子曰大行臨御儲位久未定浮議喧騰吾今就以
付之浮議何由興八月己酉次鷓鴣皇太孫至軍
中始發喪六軍號痛聲徹天地辛亥入居庸關文武百
官縗服哭迎壬子及郊皇太子親王以下素服哭迎
至宮中奉安仁智殿加斂納梓宮

九月癸未禮部尚書呂震奏太宗皇帝遺命喪服一如
太祖高皇帝倣漢制以日易月今已踰二十七日請
上釋衰服臨朝上命六部都察院詳議以聞震與部
院共奏宜素服烏紗冠黑角帶群臣皆從君服上曰

梓宮在殯朕何忍遽易自是臨朝素帶麻衣麻經朝退
仍衰服

十二月初太宗崩或有欲以他事寫勅用寶遣人馳報
者楊榮曰先帝在卽稱勅賓天而稱獲罪非輕乃令
中官以先帝崩逝月日并遺命傳位之意具啓馳報
榮初抵京上哀慟未及訪問至是有以爲言者遂降
勅獎諭之

洪熙元年五月庚辰上不豫召蹇義楊士奇黃淮楊榮
至思善門命士奇寫勅遣中官馳召皇太子辛巳
上疾大漸遺詔天下傳位皇太子是日
上崩于欽

安殿宮中以皇太子未至未發喪沐浴襲奠飯舍如禮六月辛丑皇太子至自南京頒遺詔于天下

宣德十年正月癸酉朔上不豫乙亥上崩于乾清宮

壽三十八皇太子方九歲祖母張太后取金符入

內浮言藉藉楊榮楊士奇哭臨畢請見皇太子即叩

頭呼萬歲群臣亦隨呼萬歲浮議乃息

天順八年正月上不豫既而大漸論處後事命太監牛

玉執筆書之一日東宮即位百日成婚二日定后妃名

分三日命勿以嬪御殉葬四日殯斂器服從舊書畢命

玉持付閣臣潤色玉至閣李賢與陳文彭時驚愴捧誦

歎曰所言關大體非上英明不能及此而止殉一事

尤高出古今真盛德事也十七日庚午上崩

按我朝皆有妃嬪殉葬相傳太祖有朝天女戶詳宮闈

宣廟有贈諡諸妃册辭詳后妃至英廟遺詔始革考正

統四年六月周憲王有燉薨無子上貽書王弟祥符

王有燠令其自妃夫人以下不必從死年少有父母各

遣歸其又十日憲王府以王正室鞏氏等死殉事聞賜

謚貞烈贈夫人施氏顧氏韓氏陳氏張氏李氏俱賜謚

貞順贈夫人予祭及葬用一品禮未及聞上命故也

當是時上甫十三而有此書其止殉張本哉至成化

四年遼王豪盛上言嫡長子恩鏞天亾子欲以其婦馮氏妾曹氏殉上貽書切責之令移其婦妾于宮中供養如法毋使失所二十二年寧河康僖王卒宮人王氏楊氏張氏段氏俱自盡贈夫人賜祭及葬蓋上以其節烈而旌之不知其亦從殉也嗚呼英廟之仁澤遠且大矣

成化二十三年八月庚辰上不豫甲申命皇太子暫視朝于文華殿文武百官朝皇太子如常儀戊子上大漸召皇太子至命卽帝位敬天法祖勤政愛民與凡國事之切要者誨諭備至太子頓首受命己丑

上崩壽四十一遺詔諭文武群臣

弘治十八年五月上不豫初六日昧爽司禮太監戴儀出左掖門宣內閣李東陽劉健謝遷入乾清宮至寢殿穿重幔上仙橋見御榻上着黃色便服坐榻中南面健等叩頭上令近前者再于是直叩頭榻下上曰朕承祖宗大統在位十八年今年三十六歲乃得此疾殆不能典故與先生相見時少健等對曰陛下萬壽無疆偶爾違和暫須調攝安得遽爲此言上曰朕自知之亦有天命不可強也因呼水漱口掌御藥監事太監張愉取金盃進水以漬絹拭舌勸上進藥不答

上又曰朕爲祖宗守法度不敢怠荒凡天下事先生每
多費心我知道因執健手若將永訣者上又曰朕蒙
皇考厚恩選張氏爲皇后生東宮今十五歲矣尚未選
婚社稷事重可急會禮部舉行皆應曰諾時司禮太監
陳寬李榮蕭敬等以次畢至皆羅跪榻外上曰授遺
旨太監扶案李璋捧筆硯戴儀就榻前書之上曰東
宮聰明但年幼好逸樂先生每可常請他出來讀書輔
導他做個好人健等皆叩頭仰奏曰臣等敢不盡力
上復加慰諭而退健等出至左門調旨傳禮部行之戴
儀送出東角而入越一夕而上崩矣

正德十六年二月上寢疾豹房行人張岳上疏曰臣謹
按古禮臣之事君如子之事父故君有疾飲藥臣先嘗
之親有疾飲藥子先嘗之至于侍膳問安朝夕在側一
如人子之節蓋君臣一體義理當然亦所以鎮定危疑
預備非常其所關係甚爲不小也近日聖躬偶感風疾
暫免朝參數日陛下稟氣完厚宣節得宜偶爾感冒
豈足過慮今自免朝之後群臣不聞親候玉色嘗奉藥
膳止于闕門備禮一疏恭問起居揆諸人子事親之義
臣愚深有未安也伏望陛下仰思宗社重計俯念臣
子至情每日許內閣大臣一員府部寺院大臣各一員

經筵科道官各一員朝夕詣寢所候問凡諸藥餌令其先嘗然後進御及是日內侍左右何人太醫院何官制何藥依何方該日官備細開寫揭帖送內閣收照至聖躬平復視朝仍以逐日開過揭帖具本奏聞陛下起居之詳既得漸聞于外人情自無疑慮亦可以備意外不測之變臣深思人情理法叅酌古今事勢必如此然後可安自古豈有人主寢疾不與大臣相接獨與內侍數人共之而可以迓和平之福者哉伏惟陛下不以臣言爲妄特賜施行則宗社幸甚不報

三月甲寅上崩于豹房遺詔曰朕以菲薄紹承祖宗丕業十有七年矣邁疾彌留殆弗能興惟在繼統得人宗社生民有主朕雖棄世亦復奚憾皇考孝宗皇帝親弟興獻王長子某聰明仁孝德器夙成倫序當立遵奉祖訓兄終弟及之文告于宗廟請于慈壽皇太后卽日遣官迎取來京嗣皇帝位內外群臣協心輔理率依祖制用副朕懷

是日又傳遺旨令太監張永武定侯郭勛安邊伯朱泰尚書王憲選各營馬步官軍防守皇城四門京城九門及草橋蘆溝橋等處東廠錦衣衛緝事衙門及五城巡視御史各督所屬巡邏毋得怠玩又傳遺旨豹房隨侍官

軍勞苦可憫令永勛泰憲提督統領加意撫恤罷威武團練管官軍還營各邊及保定官還鎮革各處皇店官店官校并軍門辦事官旗校尉等各還衛其各邊鎮守太監留京者亦遣之哈密及土魯番佛郎機等處進貢夷人俱給賞令還國豹房番僧及少林寺和尚各處隨帶匠役水手及教坊司人南京馬快船非常例者俱放遣以上數事雖奉 上遺旨實內閣輔臣請于 太后而行者皆中外素稱不便故釐革最先云

嘉靖四十五年十二月

上不豫初

上以保養聖躬精

意修玄嘗命御史王大任姜儆四方訪問能修玄者王大任于陝西湖廣諸省招致方外之士能合內養諸藥王金等姜儆于江西廣東諸省訪得能通符法者復命大任儆俱授翰林侍講儆不自安乞還大任仍在朝不爲翰林所齒 上雖修玄西內然權綱摠攬朝政肅然九卿庶屬奉公循法罔敢誕慢中官斂畏無或干百司事者 上常黎明就寢及巳卽興夜至五鼓猶覽章奏覽輒四五行下而裁決精詳悉當其可復宸翰灑然天縱然也自大任以方士王金等進乃獻長生等藥其品詭秘不可辨知皆非神農本草所載大較以強健陽力爲主性極燥熱 上試服之遂火發疾甚中外憂懼不

知所爲十四日 上疾大漸命內侍奉駕還乾清宮下
遺詔曰朕以宗人入繼大統獲奉宗廟四十五年深惟
享國長久累朝未有乃茲弗起夫復何恨但念朕遠奉
列聖之家法近承 皇考之身教一念惓惓本惟敬天
勤民是務祇緣多病過求長生遂致奸人乘機誑惑禱
祈日舉土木歲興郊廟之祀不親朝講之儀久廢既違
成憲亦負初心邇者天啓朕衷方圖改轍而遽嬰疾疾
補過無由每一追思惟增愧恨蓋愆成美端仗後賢
皇子裕王某仁孝天植睿智夙成宜上遵祖訓下順群
情卽皇帝位勉修令德勿過毀傷喪禮依舊制以日易

月二十七日釋服祭用素饌毋禁民間音樂嫁娶宗室
親郡王藩屏爲重不可擅離封域各處總督鎮巡三司
官地方攸繫不許擅去職守聞喪之日各止于本處朝
夕哭臨三日進香差官代行衛所府州縣并土官並免
進香郊社等禮及朕祔葬祔享各稽祖宗舊典斟酌改
正自卽位至今建言得罪諸臣存者召用歿者卹錄見
監者卽先釋放復職方士人等查照情罪各正刑章齋
醮工作採買等項不經勞民之事悉皆停止於戲子以
繼志述事兼善爲孝臣以將順匡救兩盡爲忠尚體至
懷用欽末命詔告中外咸使聞知

初上不豫欲自西苑思成宮還御乾清宮以宮中丹
雘淪落不稱路寢更命飾之至是上疾甚還宮遂崩
是日輔臣徐階及文武大臣啓請皇子裕王入主喪
事王舉哀具黑翼善冠青布袍角帶由東安門步入發
喪次命內外官謹宿衛發喪明日以大行皇帝賓天告
奉先殿報訃音于宗室諸王頒遺詔于天下

按史臣曰世宗神功盛德不可縷指大要以嚴馭吏
以寬治民以經術爲師以法律爲輔以明作修內治以
安靜飾邊防其于稽古考文之事尤爲謹備而皆發之
孝思本之敬一故功成制定華夷向風中興大業視之

列聖有光焉享國四十餘年追慕獻皇皇后如一日
每遇時節忌辰侍臣竊窺聖容慘怛享獻精虔無不泣
下者晚年雖不御殿而批決顧問日無停晷雖浚居淵
默而張弛操縱威柄不移升遐一詔艾悔尤深真可謂
不世出之主矣

隆慶六年五月上疾大漸召大學士高拱張居正高儀
至乾清宮受顧命拱等卽趨至宮左右奏召輔臣至
上倚坐御榻上中宮及皇貴妃咸在御榻邊東
宮立于左拱等跪于御榻下命宣顧命曰朕嗣祖宗
大統今方六年偶得此疾遽不能起有負先帝付託

東宮幼小朕今付之卿等三臣宜協心輔佐遵守祖制
 保固皇圖卿等功在社稷萬世不泯拱等咸痛哭叩頭
 而出是時上疾已亟口不能言而熟視諸臣頷之屬
 託甚至蓋自孝廟顧託三臣之後僅再見也

國朝典彙卷之六

都察院右僉都御史

臣

徐學聚

編輯

浙江蘭谿縣知縣

臣

吳國琦

重訂

朝端大政

六

廟號尊諡

洪武元年正月

上追尊四代考妣為皇帝皇后

詳開國

二年製太廟四代帝后冠服成命各以二襲貯以金飾木
 榭藏於各廟仍用八襲祝告焚之

十五年八月諡

皇后馬氏為孝慈皇后

三十一年六月上

大行皇帝諡曰聖神文武欽明啓運

峻德成功統天大孝高皇帝廟號太祖追諡 孝慈皇后曰孝慈昭憲至仁文德承天順聖高皇后

建文元年正月尊 皇考懿文皇太子爲孝康皇帝廟號

典宗 皇妣懿敬皇太子妃呂氏爲孝康皇后祔廟

四年六月 成祖遷 典宗孝康皇帝主於陵仍稱懿文

皇太子 呂后爲皇太子妃

按皇太子既諡懿文 帝諱又曰允炆及皇子生復命

名文奎識者曰此臣下儒生之常稱耳不類天子氣象

又改建文年號 成祖聞訝曰胡乃重複至是使臣民

遍呼與諱同無乃不祥乎小子且見其改

永樂元年六月文武百官進 太祖高皇帝及 孝慈高

皇后尊諡曰聖神文武欽明啓運峻德成功統天大孝

高皇帝廟號太祖 孝慈昭憲至仁文德承天順聖高

皇后

二十二年九月禮部同文武群臣進 大行皇帝尊諡曰

體天弘道高明廣運聖武神功純仁至孝文皇帝廟號

太宗 仁孝皇后徐氏尊諡曰仁孝慈懿誠明莊獻配天

齊聖文皇后

洪熙元年七月上 大行皇帝尊諡曰敬天體道純誠至

德弘文欽武章聖達孝昭皇帝廟號仁宗

宣德十年正月上 大行皇帝尊諡曰憲天崇道英明神聖欽文昭武寬仁純孝章皇帝廟號宣宗

正統七年十一月尊諡 太皇太后張氏曰誠孝恭肅明德弘仁順天啓聖昭皇后

天順元年正月 英宗復辟復以 景泰帝爲郕王未幾薨諡曰戾

六年十月尊諡 聖烈慈壽皇太后孫氏曰孝恭懿憲慈仁莊烈齊天配聖章皇后

七年閏七月追諡 宣廟廢后靜慈仙師胡氏爲恭讓誠順康穆靜慈章皇后修葺陵寢不紉廟

八年二月上 大行皇帝尊諡曰法天立道仁明誠敬昭文憲武至德廣孝睿皇帝廟號英宗

成化三年五月荆門州學訓導高瑤上言正統己巳之變先帝旣已北狩 皇上方在東宮虜騎薄于都城宗社危如一髮使非 郕王繼統國有長君則禍亂何由而平鑿與何由而還迨夫 先帝復辟其貪天之功以爲己力者遂加厚誣使不得正其終節惠躋祀未稱典禮伏望特勅禮官集議追加廟號以盡親親之恩事下禮部議之

十二月禮部等衙門會議高瑤所奏追加景泰廟號事僉

謂 郕王繼位六七年間行事具在實錄其廟號非臣下所敢輕議請自上裁左庶子黎淳奏曰正統十四年八月冊立陛下爲皇太子至九月群臣又奉 郕王卽帝位改元景泰緣陛下爲皇太子在前郕王卽帝位在後事理有礙至天順元年正月 先帝復位欽遵 聖烈慈壽皇太后懿旨仍以景泰爲 郕王詔告天下人倫正天理得而名正言順矣高瑤建言乃欲加 郕王廟號臣惟朝廷旣立皇太子則異時居天子之位乃皇太子也曾未半月群臣又立親王爲天子則前時所立之皇太子將何爲哉若曰主少國疑四方多事周成王之

之時姬且實有功之叔父何不遂取天位若曰神器久虛不可無人共和之際周召皆王國之懿親何不共分姬室特以君臣有定分皇太子爲君親王爲臣天經地義民彝物則截然一定而不可易也今若誤聽高瑤之言一加 郕王廟號必將祭告太廟改易舊制而行祔廟承祧之禮必將遷啓梓宮改造山陵而加珠襦玉匣之典必將追贈皇太后皇后之稱必當盡復當時所用之人所行之政且高瑤此言誣 先帝于不明陷陛下于不孝昔魯隱公內不承國于先君上不稟命于天子諸大夫扳而立之是爭亂造端故春秋首書元年春王

正月而削公卽位正大倫也。郈王之卽位內承國于何君上稟命于何主不過群臣拔已以立而遂立耳律之隱公允合無異爲人君父而不通春秋之義者必蒙首惡之名是故昌邑王旣廢未聞復爲漢某帝更始旣廢未聞復爲漢某王誠不敢悖逆春秋移不明之過加于先君而欲全孝道于子孫也陛下昔爲皇太子名正言順誰得私議。郈王乃敢廢之易以已子至使先帝久遭幽閉此非。郈王所自爲也當時館閣大臣陳循等貪圖富貴密運奸謀從諛爲之也至于天順元年郈王有疾陳循自當迎請。先帝復位却乃率領群臣

奏乞早選元良正位東宮當時皇太子見在欲選何人以臣愚見若非南城迎駕之功。先帝終無出路但迎駕者又皆貪圖富貴之人是故高爵厚祿尊顯于元年者賞其迎駕之功也嚴刑峻法誅戮于後來者罰其驕矜之罪也陛下卽位之初有罪群邪寒心破膽及見取回商輅復職然後自以爲得計又皆希進求用臣謂高瑤此舉非欲尊禮。郈王特爲群邪進用之地此必有小人主使之者亦豈可不察乎疏入。上曰景泰已往過失朕不介意豈臣下所當言顯是獻諛希恩俱不必行。

四年七月尊諡 慈懿皇太后錢氏曰孝莊獻穆弘惠顯
 仁恭天欽聖睿皇后 舊制頒詔皆置詔于橫以繩懸之自承天門頒下是年
 頒 慈懿皇太后尊諡詔執事者不恪以致繩斷橫毀
 為御史所劾竟宥之人皆誦 聖度之寬云
 十一年十二月尊 邕戾王為恭仁康定景皇帝 上嘗
 召見閣臣商輅從容議及 邕王監國時事言景帝有
 功社稷當復帝號聞者皆泣 上亦泣遂下詔上尊諡
 二十三年九月上 大行皇帝尊諡曰繼天凝道誠明仁
 敬崇文肅武宏德至孝純皇帝廟號憲宗


十一月追諡 聖母恭恪莊僖淑妃紀氏為孝穆慈慧恭
 恪莊僖崇天承聖皇太后

弘治十七年四月上 聖慈仁壽太皇太后周氏尊諡曰
 孝肅貞順康懿光烈輔天成聖睿皇后

十八年六月上 大行皇帝尊諡曰達天明道誠純中正
 聖文神武至仁大德敬皇帝廟號孝宗

正德二年十一月上 邕王妃汪氏尊諡曰貞惠安和景
 皇后

十三年二月上 慈聖康壽太皇太后王氏尊諡曰孝貞
 莊懿恭靖仁慈欽天輔聖純皇后



十六年五月上 大行皇帝尊諡曰承天達道英肅睿哲
昭德顯功宏文思孝毅皇帝廟號武宗

嘉靖元年三月遣官詣安陸上 興獻帝尊號 詳議大禮

二年正月上 壽安皇太后邵氏尊諡曰孝惠康肅溫仁

懿順協天祐聖太皇太后

七月加上 興獻帝尊諡曰恭穆獻皇帝

七年六月加上 獻皇帝尊諡曰恭睿淵聖寬穆純聖獻

皇帝

十二月尊諡 皇后陳氏曰悼靈皇后

九年□月錦衣衛千戶劉浚有事于安陸乞給驛以行疏

中稱 恭睿獻皇帝兵科給事中張潤身等言 皇

尊號本 恭穆獻皇帝浚乃稱為恭睿宐下法司治其

妄誕之罪 上曰 皇考尊諡已于七年加上 恭睿

淵仁寬穆純聖獻皇帝浚奏所稱正為遵奉詔旨潤身

等職居言路何乃顛倒是非妄行叅駁其各對狀于是

潤身等上疏伏罪詔奪俸五月

十四年正月上 莊肅皇后夏氏尊諡曰孝靜莊惠安肅

溫誠順天偕聖毅皇后

十五年九月加諡 孝靜皇后為孝靜莊惠安肅溫誠順

天偕聖毅皇后 詳后妃

十六年五月上 大行皇帝尊謚曰承天達道英肅睿哲
昭德顯功宏文思孝毅皇帝廟號武宗

嘉靖元年三月遣官詣安陸上 興獻帝尊號 詳議大禮

二年正月上 壽安皇太后邵氏尊謚曰孝惠康肅溫仁

懿順協天祐聖太皇太后

七月加上 興獻帝尊謚曰恭穆獻皇帝

七年六月加上 獻皇帝尊謚曰恭睿淵聖寬穆純聖獻

皇帝

十二月尊謚 皇后陳氏曰悼靈皇后

九年□月錦衣衛千戶劉潑有事于安陸乞給驛以行

中稱 恭睿獻皇帝兵科給事中張潤身等言 皇考

尊號本 恭穆獻皇帝潑乃稱為恭睿宐下法司治其

妄誕之罪 上曰 皇考尊謚已于七年加上 恭睿

淵仁寬穆純聖獻皇帝潑奏所稱正為遵奉詔旨潤身

等職居言路何乃顛倒是非妄行叅駁其各對狀于是

潤身等上疏伏罪詔奪俸五月

十四年正月上 莊肅皇后夏氏尊謚曰孝靜莊惠安肅

溫誠順天偕聖毅皇后

十五年九月加謚 孝靜皇后為孝靜莊惠安肅溫誠順

天偕聖毅皇后 詳后妃

改諡 悼靈皇后曰孝潔皇后

十七年九月加上 獻皇帝尊諡曰睿宗知天守道洪德

淵仁寬穆純聖恭儉敬文獻皇帝

十一月朔加上 太祖尊諡曰開天行道肇紀立極大聖

至神仁文義武峻德成功高皇帝 高后曰孝慈貞化

哲仁順徽成天育聖高皇后 太宗曰成祖啓天弘道

高明肇運聖武神功純仁至孝文皇帝

十二月上 章聖慈仁康靜貞壽皇太后蔣氏尊諡曰慈

孝貞順仁敬誠一安天誕聖獻皇后

二十年八月尊諡 昭聖恭安康惠慈壽皇太后張氏曰

孝康靖肅莊慈哲懿翊天贊聖敬皇后

二十六年十二月尊諡 皇后方氏曰孝烈皇后

三十八年九月錦衣衛指揮劉鯨以病疏乞致仕內叙其

父鐸曾隨侍 恭睿獻皇帝 上曰 皇考尊號已定

如何以 恭睿稱之鯨詞悖謬革職閑住以兵部侍郎

江東等不行參治切責而宥之

四十五年十二月上 大行皇帝尊諡曰欽天履道英毅

聖神宣文廣武洪仁大孝肅皇帝廟號世宗

隆慶元年正月尊諡 孝潔皇后曰孝潔恭懿慈睿安恭

相天翊聖肅皇后 孝烈皇后曰孝烈端慎敏惠恭誠

順贊天開聖皇太后 妃李氏曰孝懿皇后

六年六月上 大行皇帝尊諡曰契天隆道淵懿寬仁顯

文光武純德弘孝莊皇帝廟號穆宗

七月加上 孝懿皇后尊諡曰孝懿貞惠順哲恭仁儷天

襄聖莊皇后

皇妃諡

高廟成穆貴妃孫氏

莊靜安榮惠妃崔氏

文廟昭獻貴妃王氏

昭懿貴妃張氏

恭和榮順賢妃王氏

忠敬昭順賢妃喻氏

初諡昭順
文諡忠敬

昭肅靖惠賢妃 氏

恭獻賢妃權氏

端靜恭惠淑妃楊氏

恭順榮穆麗妃陳氏

康惠莊肅麗妃韓氏

昭惠恭懿順妃王氏

惠穆昭敬順妃錢氏

康靖莊和惠妃崔氏

康穆懿恭惠妃吳氏

康懿順妃李氏

惠穆順妃郭氏

恭懿惠妃趙氏

安順惠妃龍氏

恭榮美人王氏

莊惠美人

恭惠美人盧氏

仁廟恭肅貴妃郭氏

貞惠淑妃王氏

貞靜敬妃張氏

恭靖充妃黃氏

恭僖順妃譚氏

惠安麗妃王氏

追封貞靜順妃張氏

追封貞靜順妃張氏

宣廟榮恩賢妃吳氏

端靖賢妃贈貴妃何氏

贈純靖賢妃趙氏

貞順惠妃吳氏

莊靜淑妃焦氏

莊順敬妃曹氏

貞惠順妃徐氏

恭定麗妃袁氏

貞靖恭妃諸氏

恭順充妃李氏

肅僖成妃何氏

英廟昭肅靖端賢妃王氏

莊靜安榮淑妃高氏

恭莊端惠德妃魏氏

恭和安靖順妃樊氏

端靜安和惠王氏

莊僖端肅安妃楊氏

端莊安穆宸妃萬氏

貞順懿恭敬妃劉氏

安和榮靖麗妃劉氏

惠和麗妃陳氏

昭靜恭妃劉氏

榮靖貞妃王氏

恭安和妃宮氏

恭靖莊妃趙氏

恭僖成妃張氏

僖恪充妃余氏

端惠昭妃武氏

景帝恭靖賢妃李氏

憲廟恭肅端順榮靖皇貴妃萬氏

恭恪莊僖淑妃紀氏

昭順麗妃章氏

恭懿敬妃王氏

恭惠和妃梁氏

莊懿德妃張氏

莊靖順妃王氏 康順端妃潘氏 榮惠恭妃楊氏

靜僖榮妃唐氏 靖順惠妃郭氏 和惠靜妃岳氏

端僖安妃姚氏 端順賢妃柏氏 端榮昭妃王氏

睿廟端靜淑妃王氏

世廟端和恭順溫僖皇貴妃王氏 悼隱恭妃文氏

榮和惠順端僖皇貴妃閻氏 昭靖徽妃王氏

莊順安榮貞靜皇貴妃沈氏 恭僖麗妃王氏

恭淑安僖追封榮妃楊氏 榮安貞妃馬氏

榮淑康妃杜氏 榮昭德妃張氏 端惠永妃徐氏

懷榮追封賢妃鄭氏

穆廟昭榮恭妃 氏 恭惠莊妃劉氏 昭靖敬妃 氏

昭順英妃 氏 恭靜和妃趙氏 莊僖榮妃 氏

榮悼安妃 氏

神廟恭順榮莊端靜追封皇貴妃李氏

莊靖德妃許氏 溫靜順妃常氏

東宮諡

懿文 皇太子標

懷獻 皇太子見濟

悼恭 皇太子祐極

哀冲 皇太子載堊

莊敬 皇太子載癸

憲懷 皇太子翊鉞

公主諡

悼簡 德安公主

仁廟第四女蚤夭而最鍾愛故特諡

貞懿 永嘉大長公主

世廟時朝國公郭勛請追諡高祖母大長公主特賜諡蓋異典云

國朝典彙卷之七

都察院右僉都御史

臣徐學聚 編輯

太子太傅工部尚書

臣黃克纘 訂正

浙江蘭谿縣知縣

臣吳國琦 重訂

陵寢

熙祖葬祖陵在泗州基運山 德祖 懿祖就祖陵塋祭

按基運山設泗州祠祭署奉祠一人以朱氏世官朱本

宗人壻也陵戶三百十四家長至正旦太牢三清明中

四元孟冬朔少牢三奉祝行事

洪武二年二月詔立皇陵碑加 仁祖淳皇帝陵名曰英

陵山名翊聖山立皇陵

四月更英陵曰皇陵立衛守之

三年 月 上發建康往濠州省陵墓 上追念 仁祖

太后始葬時禮有未備議欲改葬問博士許存仁等改葬典禮當何據存仁等曰禮改葬易常服用總麻葬畢除之今當如其禮 上惻然曰改葬雖有常禮父母之

恩豈能盡報耶命有司製素冠白纓衫經皆以粗布爲之起居注王禕曰比總當爲重矣 上曰與其輕也寧重時有言改葬恐泄山川靈氣乃不復啓葬但增土以培其封陵旁居民汪文劉英於 上有舊召至慰撫之

遂令招致隣黨二十家以守陵墓命有司復其家

八年三月命 皇太子及諸王往鳳陽祭皇陵 上惻然

曰吾祖宗去世旣遠吾父母又相繼早亾每念劬勞鞠育之恩惟有感痛而已今日雖爲天子富有四海欲致敬養盡孝爲一日之奉不可得矣哀慕之情昊天罔極今鳳陽陵寢所在特命爾等躬詣致祭以代朕行禮孔子曰事亾如事生事亾如事存爾等敬之因悲咽不自勝太子諸王皆感泣

十月詔翰林考議陵寢朔望節序祭祀禮學士樂韶鳳等奏擬每歲元旦清明七月望十月朔冬夏二至日用太

牢其伏臘社每月朔望日則用特羊祠祭署官行禮如節與朔望伏臘社同日則用節禮從之

十一年二月命皇太子詣中都祀皇陵中書左丞相汪廣洋從

四月重建皇陵碑上以前所建碑恐代草者有文飾至是復親製文命江陰侯吳良督工刻之

十九年八月命禮部制德祖玄皇帝玄皇后懿祖恒皇帝恒皇后熙祖裕皇帝裕皇后袞冕冠服命皇太子至泗州盱眙縣修繕祖陵葬衣冠祭告

按皇陵置中都留守司皇陵衛皇陵祠祭署奉祀二人劉氏汪氏祀丞二人汪氏趙氏劉義惠侯繼祖孫二汪氏皆汪氏老母孫陵戶三千三百四十二家長至正旦太牢清明中元孟冬少牢奉祀行事朔望少牢留守行事弘治元年勅內官一人監護

三十一年閏五月高皇帝葬孝陵

按孝陵四十妃嬪祔葬陵設孝陵衛孝陵神宮監孝陵祠祭署清明中元冬至聖旦太牢正旦帝后愍忌酒果勲戚大臣一人奉祀事國有大事遣大臣祭告孝陵東有懿文太子陵祀禮視孝陵四孟歲暮忌辰加牲署官行事

建文四年 成祖駐師龍潭顧望鍾山愴然下淚諸將請
曰今禍難垂定何以悲為 成祖曰吾往日渡江卽入
京見吾親比為奸惡所禍不渡此江數年今至此吾親
安在瞻望鍾山仰懷陵寢是以悲耳言已益泣不止諸
將皆泣

永樂二年五月錦衣衛奏明日 上詣孝陵請具法駕
上曰不用但以騎士數人前導而已顧侍臣曰明日
皇考忌日正屬感慕之時何用法駕非為辟除道路則
前導騎士亦可不用
七年五月營山陵于昌平縣遂封其山為天壽山

按 成祖擇壽陵久不得吉壤七年 仁孝皇后尚不
葬禮部尚書趙玠以江西術士廖均卿至昌平縣徧閱
諸山得縣東黃土山最吉 上卽日臨視定議封為天
壽山命武義伯王通等董役授均卿官或曰定長陵者
王府尹也亾其名亦不知何許人

十三年九月昌平壽陵成

十七年十一月廿露降孝陵松柏三日

二十二年十一月 太宗葬長陵

洪熙元年八月遣鄭王瞻垓還南京謁孝陵 上謂之曰
太祖開創鴻業以遺子孫陵寢所在如何能忘今卽位

之初政務所係不遑躬謁汝其代行其洒掃有弗虔封樹有弗勤周衛有弗備皆嚴飭之必恭必慎以稱予意

九月 仁宗葬獻陵

初 仁宗賓天 上命有司擇葬地得吉兆于天壽山之陽召尚書蹇義夏原吉等諭之曰國家以四海之富葬其親豈惜勞費然古之聖帝明王皆從儉制凡孝子思保其親之體魄于永久者亦不欲厚葬秦漢厚葬之患足爲明戒 皇考遺詔務從儉約天下所共知今建山陵予以爲宜遵先志卿等知之如何義等對曰聖見高遠發于孝誠萬世之利于是命成山侯王通工部尚書黃福總其事其制度皆 上所規畫三月告成

宣德元年二月乙酉初 上謂侍臣曰朕自幼鍾愛于

皇祖未嘗一日不侍左右弘謨偉略隨事訓教 皇祖妣同歷艱難弼成國家撫育備至我 皇考德紹先烈仁覆蒼生不期年而遽上賓劬勞之痛終身山陵在望霜露之感尤切將以清明日展謁至是車駕啓行丙戌至天壽山 上遙望二陵松柏鬱茂因嗚咽流涕詣陵行禮不勝哀慟左右亦感泣

五年二月乙未 上奉 皇太后率 皇后謁長陵獻陵車駕發京師三月壬寅駐蹕陵下謂侍臣曰 皇祖嘗

言古帝王陵寢有崇奢麗及藏寶玉者皆無遠慮吾子孫宜戒之不可蹈也此語朕恒記憶不忘今所建陵寢皆皇祖當時規畫不敢有所增益戊申還京師十年六月葬宣宗景陵按天壽山七陵惟景陵規制獨小至嘉靖十五年稍大之天順八年二月英宗葬裕陵按舊制祭陵惟遣駙馬一員而各衙門官隨行陪禮是年秋祭禮部言今加裕陵爲四相去隔遠各官往復奔走不無倦怠失儀乞遣駙馬二員率陪祀官分謁行禮從之遂爲定制

成化四年亦月詔禮部會議大行慈懿皇太后陵寢太后上嫡母也司禮監傳旨命大臣議葬所衆相視莫敢發大學士彭時曰此一定禮無可議者梓宮當合葬裕陵神主當祔廟禮部尚書姚夔贊之曰此正禮也太監夏時曰不可慈懿無子且有疾不宜入山陵只宜別葬彭時曰太后母儀天下近三十年爲臣子者豈忍議別葬此事關係非小一或乖禮何以示天下後世諸內臣不以爲然彭時謂同列曰此事當力爭不可使上有失德已而上御文華殿召內閣與諸內臣至前面議上曰慈懿太后葬禮當如何彭時對曰

只合依正禮行庶全聖孝。上曰朕豈不知依正禮行是好但與。周太后有碍故令爾等會議務要處得合宜商輅曰外議洵洵若不合葬則人心不服且於聖德有損劉定之曰孝子從義不從令。聖母有言亦不可從也。上默然良久曰合葬固是孝若因失。聖母心亦豈得爲孝乎時曰。皇上大孝當以。先帝之心爲心。先帝待。慈懿太后始終如一今若安厝於左虛其右以待後來則兩全其美矣。上雖未允而玉色甚和無怒容時因曰臣等意未盡欲具本言之乞。皇上申勸。聖母以終大事。上領之。

彭時等上言臣等仰惟。大行皇太后作配。先帝正位中宮及。皇上嗣居宸極尊爲慈懿皇太后蓋。先帝全夫婦大倫。皇上全母子深恩天下後世無容議矣。今壽終之後所宜奉梓宮祔于裕陵奉神主祔于太廟此古今不易之理亦。先帝與。皇上之初心也今聞欲別卜葬地臣等實切疑懼竊謂。皇上所以若是者必以今。皇太后千秋萬年之後當與。先帝同尊于陵廟自嫌二后竝配臣等考之前代一帝二后竝祔陵廟者未易悉數只如漢文帝尊其所生母薄太后然于其嫡母呂太后雖得罪于宗社尚且仍與父高帝竝葬

長陵無所改易宋仁宗追尊其生母李宸妃爲太后然於其嫡母章獻劉太后雖本無子尚且仍與父眞宗同祭太廟無所嫌忌皇上於慈懿皇太后昔日致其養今日盡其哀雖文帝仁宗無以加矣若陵廟之祔稍有未合於禮則致貽後議有掩前美况千秋萬年之後今皇太后與慈懿皇太后同在陵廟不相妨碍且愈足以見二太后生存之日雍和無間永久之後並美無窮此臣等深願也伏聖體先帝之心稽前代之制重念綱常之大以臣等所言下禮部會文武羣臣議務合天理允愜人心則天下幸甚又謂夫有出妻之理子無棄母之道此事關係綱常不可有失貽議萬世言甚愷切上命禮部會群臣定議以聞

七月姚夔及文武大臣集議以爲慈懿太后宜與今皇太后千秋萬歲後俱合葬裕陵慈懿居左皇太后居右一體祔廟上答詔云卿等言固正理但聖母在上事有窒碍朕屢請命不蒙俞允又令內臣往返數次懇請堅意不許朕平日孝奉兩宮如一若此違逆致有他虞豈得爲孝今當於裕陵左右別選吉地安葬崇祭如禮庶幾兩全卿等其體朕意夔會群臣復奏云上所有者祖宗之天下當守祖宗之成法祖宗成法卽

先皇帝與母后猶不敢違况陛下乎若今日之禮稍失則非先皇帝之心損母后之德皇上不得爲至孝當起敬起孝以諫而號泣隨之可也若母后猶持不從則當用尊無二上處親以大義之道斷而行之上猶未從於是內閣復請會議詔下群臣再議夔等言益切謂或者曰上爲皇太后所出不可薄於此而厚於彼殊不知慈懿與皇太后他日竝合裕陵竝享太廟略無輕重何謂有厚薄哉或又曰慈懿無子宜與恭讓皇后同此尤不然恭讓在宣廟時已嘗遜處別宮而立孝恭皇后矣慈懿在當時未嘗退

處他宮未嘗別立一皇后豈得謂之同乎况宣宗幼年追復恭讓徽號悔恨無及自笑曰此朕幼年事益可知矣又况皇上繼統承緒卽同其子而可謂非其所出而別議乎復繼以危言及群臣伏文華門以待上悉覽其奏懇請於皇太后自己至申稍見從遂出數奏同辭批云卿等所言皆合朕意合葬之禮蒙允行矣於是文武群臣皆呼萬歲而退

九月祔葬孝莊睿皇后於裕陵

二十三年十月憲宗皇帝葬茂陵

十一月聖母孝穆皇太后祔葬茂陵

弘治元年四月天壽山大風雹上遣官祭告戒諭群臣

修省

十八年六月葬孝宗於泰陵

正德十三年四月朔上以大行太后梓宮將祔葬親

詣天壽山祭告六陵

祔葬孝貞純皇后於茂陵

十六年五月武宗葬康陵

嘉靖三年三月定安陵松林山名爲顯陵

八月顯陵司香太監楊保上言陵殿門墻規模狹小乞照

天壽山諸陵制更造工部尚書趙璜等言陵制當與山

水相稱恐難概同今殿墻以黃瓦覆但宜添設明樓石

牌及改司香衙門爲神宮監置護衛口顯陵衛其餘未

備房屋應創新者另爲添造應仍舊者止加修飾不必

大爲改作上從部議

九月錦衣衛革職百戶隨全光祿寺革職錄事錢子勳希

旨言獻皇帝梓宮改葬天壽山事下工部尚書趙璜

等以爲改葬不可者三皇考體魄所安不可輕犯一

也山川靈秀所萃不可輕泄二也國家根本所在不可

輕動三也昔高皇帝定鼎南京而仁祖之陵遠在

鳳陽文皇帝遷都北京而孝陵遠在鍾山皆不敢遷

改陛下之視顯陵猶太祖之視仁祖太宗之視孝陵也若如全等言則上啓寶山下瞰金井梓宮搖撼聖靈震驚令數千里外跋涉山川蒙冒霜露非仁人孝子之所忍言者爲陛下謀不忠甚矣請以臣等言下廷議上乃命禮部集群臣會議以聞時五官靈臺郎吳昇嘗與事顯陵亦上言以爲不可遷疏下禮部並議禮部尚書席書等上議山陵乃先帝體魄所藏事體至重我祖宗陵寢未嘗遷動是以國家百六十年來皇圖鞏固帝德重光也臣等伏聞顯陵勢如伏鳳氣結盤龍此實山川之形勝帝王之幽宅也今隨全等乃肆妄議

乞治其罪上曰山陵遠在安陸朕瞻望哀切命再議十月席書等再議臣等感陛下哀切之言仰聖人孝思之至但舉大事當順人心今多官皆曰帝魄不可輕動地靈不可輕泄人心如此陛下不可不信從也上命罷議于是定顯陵祭如七陵儀遣省臣行禮

六年十月前御史虞守隨罷官家居乃撰述皇陵正議數千言以進上以爲陵寢重事守隨爲言官不聞獻議而以考察罷去乃妄議惑人有希進心下御史按問因諭大學士張璁曰守隨奏進皇陵正議蓋此舉非常前已下廷臣及內閣兩議皆以爲不可地道尚靜體

國朝典彙卷七
陵寢
魄貴安豈宜輕舉我皇考葬已八年一旦妄動豈勝
震恐若於萬年之後奉護慈宮以附陵室何不善也卿
與萼密議何者爲嘉擇而行之璉言廷臣之議謂太
祖不遷皇陵成祖不遷孝陵皆正論也舜葬於蒼梧
之野蓋二妃未之從也季武子曰周公蓋祔此祔葬之
禮自周公以來未之有改也聖慈萬歲之後奉祔顯陵
在情禮爲俱盡矣惟聖明無二焉上嘉納之已錦衣
百戶張得錦復上疏請遷陵上諭所司詳議

十一月上諭輔臣張璉曰今日朕侍聖母垂泣諭遷
陵一事且有訓曰他日必以吾南隨可也朕欲將後日
之計作一文書藏之世廟以示前年奏歸之意今密與
卿計可否璉對此乃當諱之事不宜預言上復諭曰
朕昨奉聖母所云五六年間只想啟請先帝梓宮
來京不想今日重加修造已定不易之禮但後日將吾
以南遂泣下朕惶慙從容奏曰皇考安葬已八年一
且輕舉恐震驚靈駕子初命禮官詳議近又下百官議
皆云陵與廟不同實難遷也聖母復慰諭朕曰先
帝奉遷之事委實重大亦擾百姓但他日必將吾隨
先帝南歸則吾無憂也朕復奏曰子豈敢不記之中心
聖母旣如此子當與大臣圖之此等事非聖母之慮

尤非子所宜言也但慈訓及之敢不奉對朕因如此重
事故昨語卿此言似輕發其實不得已也朕說識於世
廟又恐那時朕不在也故告卿欲卿記之璉云今日
聖母福德方升誠不宜務及後事若以慈心尚未釋然
姑俟顯陵工完 皇上可代 聖母親告世廟期以萬
歲後同居于陵則幽明之情兩無所憾矣
七年 月禮部右侍郎嚴嵩以顯陵工成因言天眷陛下
靈異非一恭 上冊寶其辰燠雲釀雨及改題之際靈
風飄然若神靈彷彿而來下奏安神牀前夕愁霖徹霄
及行禮之際祥曦散彩群臣歡慶而動色至于白石崖

棗陽有群鶴繞集之祥碑 入漢江有河流驟漲之異
此兩事尤爲殊特昔 太宗建碑孝陵得美石于陽山
學士胡廣有記營建北京得大木于蜀有巨石當道夜
間吼聲如雷石割自開木由中出勅湖廣勒神木山之
碑今奇應靈貺事適相類不有紀載後世何述臣請輔
臣撰文行令工所立石以紀天眷聖孝昭示萬世與茲
山無極而營建歲月工費諸臣執事微勞皆附著之俾
後有考焉禮部尚書方獻夫請從嵩奏 上曰修建顯
陵本以伸朕追孝之情今嵩所奏靈異實我 皇考聖
德隆至格于上天致此祥應于朕何預第嵩言出自忠

赤誠不可泯依擬撰文爲記立石垂後

八年本月營建悼靈皇后陵度用鄉民尹甫園地六頃已而守陵內臣郭鑑又度其地十五頃餘將爲果園給事中張潤身言此地爲民恒產且上有墳墓百餘所宜仍還民便行上命給民種住其陵城占用者仍於近地如數撥補

二月以悼靈皇后安葬大學士楊一清請詣陵寢題主因得展憲孝武三陵上報曰卿請足見追戴朕惟祖宗朝凡清明躬率群臣謁陵後遂命官行禮朕以藩服入承宗祀其時當謁見諸陵奈無爲我計者題主事固

重卿係首臣况高年所不欲勞遣者朕心未安也夫前

日更題皇祖妣皇考神主則用聰蕩今用首臣恐

弗宜後別有事卿往無不可一清謝弗及因言聖駕

謁陵係追遠至情容臣查例待來春舉行上報曰昨

卿以朕言又謁陵一事爲可朕嘗覽宣廟實錄內或

清明謁陵及季秋巡邊爲常年之例某年清明常奉

母后謁二陵一次至成化以後止而不行皆命親王勲

臣代爲行禮卿云待來春行之今且備查停當儀注一

清言宣廟時曾謁陵一次途間勸農卹民之事居多

巡邊雖有舊例非今日所當行母后中宮亦不宜往

上復報曰卿昨備查宣廟實錄內謁二陵事宜來聞夫宣廟時正當海內平康黎民安福故一切舉事無所擾者今方災變之時民不聊生惟當務所以安民之計可也豈復敢擾以事乎但朕所欲一展拜諸陵以伸追感之情耳今歲不及且暫已俟來歲議行

時有伐孝陵旁古墓者南京科道以聞上諭刑部曰陵寢禁山何乃不謹巡誰縱人樵採以致掘伐古塚其命南京法司逮問守護指揮并巡山巡捕守把內外官校若宜緝捕掩埋者南京禮部會官看議以聞于是刑部叅劾南京守備魏國公徐鵬舉南和伯方壽祥兵部尚

書王憲上責鵬舉壽祥對狀以憲任事未久貫之

九年四月禮部奏定安陸州官員謁陵廟禮謂家廟尊嚴闕密不宜輕褻請如泗州祖陵鳳陽皇陵南京孝陵儀惟湖廣鎮巡及三司等官有事地方者全日卽拜謁陵廟其餘公差經過官員止謁陵不必謁廟著爲令報可長陵等陵神宮監楊賓奏乞將各陵園等戶盡復其家戶部覆言陵園等戶供役輕省豪民避重就輕每多投充民力坐此重困故先朝斟酌損益載在會典每戶連本身止免三丁况今差占庫夫柴夫等役繁多如繫籍園陵者全戶優免則遺下差役必更加派小民恐致負累

流徙宜令有司止優免如會典例 上從部議

十年 月皇陵祠祭署土民田學等上言臣等三千六百

餘家編視皇陵專供醴粢直汎掃復其征賦宣德增置

視陵太監恣肆箕歛陵戶逃亾有誤祠祭乞革太監以

蘇子遺下部覆奏當革 上不從第命內臣勿預民事

三月 上諭內閣昨因議祖陵皇陵二山名朕思孝陵在

鍾山亦宜同體 文皇既封青土山爲天壽山今又擬

顯陵爲純德山而獨鍾山如故于理未安朕惟祖陵宜

曰基運山皇陵宜曰翔聖山孝陵宜曰神烈山竝方澤

從祀以基運翔聖天壽山之神位設于五嶽之前神烈

純德山之神位次于五鎮之序其示禮官知之

十月光祿寺厨役王福錦衣衛千戶陳昇請改顯陵迎葬

天壽山以全大孝而緣事監生詹啓温州武舉杜承美

爲民兵馬周密湖廣生員蕭時用致仕僉事甯河相踵

具奏專下部議覆言此奏與昔年隨全錢子勳之說相

同尚書席書已備論于前大學士李時又極論于後况

先皇帝衣冠之藏歷歲已久顯陵之役建造經年封其

山爲純德名其府爲承天表章丕顯事體已定而一旦

議遷老成長慮者多爲駭愕乞重降嚴旨禁絕細人無

得妄議園陵重事傷國大體 上從部議勅再奏擾決

不輕宥

十三年十月詔更祖陵黃瓦先是洪武中建泗州祖陵令江南造黃瓦以道遠未至先以黑瓦覆之既而殿廡告成遂不復更瓦至皆積不用至是奉祀朱光道具疏請用故所積黃瓦更正殿廡及增設陵前石儀與鳳陽皇陵同制禮部覆如其議 上從之

十五年三月 上諭禮部尚書夏言曰朕去歲已與卿擬定待廟工告成方舉謁陵之典然朕惟因小就大卽議山陵之建一面做他工辦物料及至廟工之完正接而與造之庶不虛曠人力其會勛時鼎臣瓚庭樞五臣計

聞言等覆奏山陵重事必須精擇請先命文武大臣率欽天監官審察停妥具圖還奏 皇上方行謁陵之禮親自閱視聖心允當然後擇日興工 上復諭曰卿等所議雖便未免少禮若因造山陵而卽日謁陵恐非敬祖宗之意也今不可緩誤歲時不必較朕意以爲先一意舉謁拜之典回復遣大臣相地還奏方朕親往視之來歲之後或清明或霜降間修拜謁之禮以盡時思此非他餘務比必當行之事又如西山 宣廟后 景皇帝亦當一拜之言等因奏伏蒙聖諭仰見 皇上尊祖敬宗之誠請卽於夏孟上旬展謁 上乃降諭曰朕非

弱支人上戴皇天隆眷嗣續祖宗大寶仰列聖陵寢禮
當躬謁 皇祖皇考道所不及各命官奉朕孝意祭告
天壽山長陵等七陵朕躬叩拜西山 皇高祖妣恭讓
章皇后 皇曾叔祖景皇帝陵所亦展拜一次庶慰朕
追感之情既又諭茲修謁陵之禮必一同奉 聖母行
又后妃宮眷當從俱令禮部具儀以請于是二十一日
聖駕發京師出德勝門次沙河次日到天壽山 上初
至陵下立行宮門首祇候 聖母駕至親侍降輿以入
百官咸觀仰贊聖孝之至云明日謁長陵登長陵明樓
拜陵碑次謁獻陵景陵語從臣武定侯郭勛等曰景陵

規制獨小又多損壞其於我 宣宗功德之大殊爲弗
稱當重建宮殿增崇基構以隆追報又明日謁裕陵茂
陵泰陵康陵又明日駕發詣西山謁 恭讓章皇后
景皇帝陵還御行宮又召郭勛及輔臣李時等論之曰
七陵多有損壞當并功修飭長陵神道宜用石甃其石
像等項宜各護以石臺勛等請傳示禮部議舉從之
上駐天壽山行殿召郭勛夏言諭曰適過沙河一帶見居
民甚少野無農事此地祖宗園陵所在甚切朕心今日
昌平州官率耆老生徒來見宜有詔諭是夕卽自草勅
稿漏下二鼓復召李時捧出因問曰七陵在此須人守

護卿等何如處之時曰昔丘濬曾議京師當設四輔以臨清爲南昌平爲北分薊州保定爲東西各屯兵一二萬以護京師若於昌平添設一總兵南護京師北護陵寢增設軍馬自爾軍民稠密上曰卿等可勘議以聞初上至行宮奉聖母觀九龍池岩下設一黃瑄殿以奉聖母上坐胡床岩樹下在聖母帳殿之側張小蓋召勛時言侍左右復命中官引觀龍池泉竇久之是日賜勛時言乘馬各服新賜蟒衣飛魚以從上祀陵回奉聖母泛舟西湖觀玉泉山上製行舟次序圖諭示言等御舟居中左一舟檣書少保文臣二員

賜時言共之右太傅武臣一員賜勛舟共二十五艘聖母以下至宮眷侍衛皆序列有差旣而賞扈從功賜工部尚書林廷楫侍郎甘爲霖銀幣郎中劉應授張問員外郎郝守正勞傳相潘瑞左傑主事皇甫沔劉粲等俱鈔幣從爲霖之請也

〔按〕夏言進御詩曰百年不覩朝陵駕父老歡呼識漢儀春川沙河河水上千村花柳暎龍旂蓋謂本朝謁陵之典自宣宗後五朝不復舉歷百二十年也

李時夏言各恭和上御製祇謁七陵并奉聖母觀玉泉山詩暨恭紀扈蹕詩十三首以進上嘉納之

四月 上以展謁七陵還乃遣成國公朱鳳往祭孝陵英
國公張溶祭顯陵以伸追報之孝

先是 上恭謁七陵召郭勛李時夏言及欽天監正夏祚
等待從 聖駕親詣天壽山相看迤東十八道嶺風氣
翕聚堪爲大吉之地 上猶論言訪求精知地理之人
不拘此山博選吉壤言曰 太宗營山陵於昌平縣命
禮部尚書趙玚以明地理人廖均卿等擇地得吉于昌
平縣東黃土山車駕臨視遂封其山爲天壽卽今七陵
所在是也今宜訪廖氏等子孫必有秘授祖術得其真
傳者旣而謁告諸陵畢率欽天監官親擇吉地復諭曰

適觀吉地咸可爲陵惟祖宗所遺本諸天錫旣越 列
聖之地恐朕未可當今日旣定宜勿他適還京可卽議
營造否則必蹈前爲也卿等可力贊之勛等言山陵之
事前古帝王皆所諱言惟我 太祖 太宗嘗預修陵
寢至今相傳以爲非常之聖乃有非常之舉言因上言
禮君卽位爲禪昔漢文帝自表瀍西唐太宗詔營九巖
則是古者皆預造山陵蓋旣達始終身復親見且省子
孫經營不煩費人力此高世之見也我 太祖 太宗
悉先有事故二陵地理竝獲純吉福澤無疆今 皇上
因謁天壽山陵親覽十八道嶺可爲萬年壽宮遂勅臣

等以預建之事仰見睿用明達真出恒情萬萬臣等敢不勉從聖志謹將營造事宜條例以請翼日復諭曰預建陵墓大臣已諮但恐衆有未與可行可止爾百官以及國之耆民可一一言之於是掌宗人府事駙馬都尉京山侯薛元掌吏部事左侍郎霍韜等并寺院科道及宛大耆民高輔等合辭勸建上從之

上詣天壽山祭告修飭七陵并預建壽宮時部議祭告惟太宗長陵合請皇上躬詣行禮諸陵宜遣大臣代告其興工吉日并駕發吉期宜行欽天監選擇上曰不必擇日二十一日卯時興工修理陵殿預建陵墓卽本日申時朕于十九日發行親告皇祖太宗遣告

六聖獻陵英國公張溶景陵武定侯郭勛裕陵遂安伯陳鏞茂陵輔臣李時泰陵禮部尚書夏言康陵駙馬謝詔天壽山之神尚書顧鼎臣后土司工之神工部尚書林庭楫各行禮至日駕發京師次沙河行宮明日駐蹕天壽山諭曰朕昨恭謁列聖諸陵仰瞻玄居享殿歲久傾圮宜加修飭及朕法皇祖故事預作幽宮于太宗之左側下勅諮問臣民合辭以爲當建所宜從之俱已擇日興工惟茲事體尊崇功程重大仍特命卿太傅勛輔臣時知建造事總督工程少保言同知建造總

國朝典彙卷七
擬規制兵部尚書張瓚提督領軍署都督僉事陸松監
督工程卿等宜竭誠殫慮督理是勤務俾工作完美建
造如式以爲永久之圖斯副朕意祭告禮畢二十八日
車駕還京

七月 上諭禮部尚書夏言曰陵禮制故嚴廟中一帝一
后陵則二三后配葬今別建奉慈殿不若奉主於陵殿
爲宜且梓宮配葬而主乃別置近于黜之非親之也此
關典禮其會議以行言乃會內閣覆奏 上曰然此與
崇先殿不同周人祀后乃始祖之母今奉慈殿但名存
耳四時之祭舞樂俱無於是定議奉 孝肅太皇太后

神主于裕陵 孝穆皇太后 孝惠太皇太后于茂陵

十六年召大學士夏言等面諭前在陵上曾諭卿獨長陵
有功德碑而六陵未有無以彰功德今宜增立示所司
行

郭勛提督陵工論劾太監溫璽王朝稽遲陵工詔璽革職
聞住朝下錦衣衛

五月同知建造事夏言進壽宮圖式言疏臣等扈從聖駕
至天壽山祭告召見行宮議及壽宮規制欲遜避祖陵
節省財力享殿欲用磚石爲之示儉樸地中宮殿等制
以虛文勞費且空洞不實非永固之圖欲盡釐去仰見

聖德謙光聖慮久遠敢不將順但恐過于減損無以稱
臣子尊崇之禮其寶城門樓亭殿門廡一切之制所宜
比照長陵少存尊避以垂萬年之觀前蒙面授欽畫壽
宮圖式比諸長陵減殺太多臣謹督令匠氏參酌議擬
畫圖貼說進請施行其東山口小山俗呼天壽改名平
臺以正其謬又論建天壽亭以識皇祖聖蹟此實大
孝之舉謹併進建亭圖其皇妃從葬之制列聖以來
或陪葬或別葬具載會典竊謂帝后合葬諸妃陪葬乃
古今經常之制協幽明依附之禮但義不當由隧似宜
于外垣之內寶山城之外明樓之前左右相向以次附
焉庶合禮制亦謹畫圖貼說以進上從之曰未盡者
當親往定示圖畱覽

九月 上如天壽山祀陵諭秋祭七陵于十八日發京長
陵朕躬拜獻陵以大臣郭勛景陵李時裕陵徐延德茂
陵夏言泰陵崔元康陵衛鐔陳后陵謝詔各行禮二十
五日回京時宣府警報日至兵部請遣防禦從之
十一月 上諭 景皇帝陵碑偏置門左非宜可建亭于
陵門外大門內庶稱尊崇又諭 太宗東西井二妃墳
并 憲廟十三妃墳宜各立石碣表識金山各妃墳所
之祭宜併入天壽山各陵殿配祭金山墳祭罷免部議

覆乃令建亭立碣諸祀移祀陵殿著爲令

十七年 月工部虞衡司員外皇甫汭以山陵運石墊道稽遲爲郭勛所論刑部議贖罪還職 上不從特旨降用出爲黃州府推官

巡按直隸御史楊紹芳擬論盜伐 皇陵樹木孫紀等罪如盜大祀神御器物律斬家屬仍遵 英宗聖旨發遼東邊衛充軍都察院議覆謂大祀神御物皆指神御在內祭器帳幄之物而言今山陵樹木陵寢護衛之物在野所產較之有間所以律擬盜園林樹木罪止杖一百徒三年正以此也且 英宗聖旨云處以重罪未有定

名今紀等本以山野愚民趨利蹈禍比擬前罪不無過

重 上曰天壽山 祖宗陵寢所在培養林木關係甚

重故我 英宗特降嚴旨禁治近年法令縱弛肆伐無

忌賊人敢於率衆屢犯今既御史論奏爾等却欲寬縱

又不參究巡視之人具以狀對孫紀依原擬盜候處決

家屬發遼東邊衛充軍未獲嚴行捕緝期于必獲更揭

榜申禁已而都御史王廷相引罪罰俸一月首領兩月

四月聖蹟亭成初 上以平臺山爲 文皇帝駐蹕之所

命構亭名曰聖蹟至是成 上欲躬祀之庚戌駕發京

師壬子祀 文皇帝于亭中癸丑御沙河宮頒食從臣

國朝典彙卷七
甲寅還京御史沈越上言聖駕屢謁山陵孝思惟永因
條法祖六事曰務學曰勤政曰攝躬曰崇正曰納言曰
曰親賢上之 上嘉納之

御史陳讓上言頃者陛下定大禮擬合葬 睿宗皇帝于
天壽山大峪之陽此固以體 慈闈之念然臣聞葬者
藏也欲人之不得見也今出 聖考玉魄于善藏之地
雖封累襲能無疑哉黃帝衣冠之陵在陝西延安府中
都縣名爲橋陵舜葬九疑二女不從則古人事死之禮
先廟後墳重魂輕魄蓋知鬼神之情狀也臣以爲宜
奉 睿宗皇帝遺冠帔奉以合葬于顯陵梓宮于大峪

山側顯陵之在承天者當爲二聖衣冠几杖之藏以當
荆襄旺氣疏入 上曰朕奉遵遷 皇考顯陵乃據理
襄事國家重典屢經群臣集議成命已下矣陳讓輒引
渺茫不經之說敢于阻撓惑亂中間言詞展轉矛盾甚
爲欺妄且竝建二陵用衣冠交葬從古所無尤見乖謬
其從實以對已而讓引罪狀且自辯詔黜爲民

十一月 上閱長陵碑欲更 成祖謚號命鋟木加碑上
郭勛上疏以爲宜盡確舊字更書之可以垂永久 上
不悅曰朕不忍琢傷舊號顧不如爾心命禮部翰林院
議禮部覆勛言非是請遵奉聖諭如式刊製擇吉奉安

詔可

十八年二月望 上幸承天府三月巳卯至承天謁顯陵
辛巳駕至純德山及紅門降輦稽首遂乘騎登陵山立
表于 皇考寢陵之北周覽久之命改營焉御製純德
山喜而自得之詩曰南幸湖襄地陵寢切衷腸周視親
園內廻旋四五岡茂茂鋪茵厚森森列障長龍高生意
廣虎伏世傳昌抱懷羅玉砌繚繞布金牆黝冥土色壯
允矣稱玄鄉拔聳戒夷險平坦免蹉防鎮靜資山祇尊
妥奉先皇自是 神靈悅屢致朕心量爲此自得吟庶幾
永不忘又製再閱顯陵小歌茂茂兮純德山葱葱兮王

氣接雲霄卜兆允茲吉且豐屢視慎秋毫恭惟皇隧旣
孔安伊何必復嘈嘈祇有思親獨苦心幾番血淚洒黃
袍命輔臣等屬和壬午詔增顯陵圍垣遂定新玄宮之
之式自是遷耐之議始寢

詔改吏部右侍郎顧璘于工部時顯陵肇工命璘領山陵
事璘長于料簡而程省費懈調發有制視他所營率損
費十五而功實倍之

巡撫江西都御史王暉上言臣句容人句容朱家巷爲
聖祖肇跡之鄉明載玉牒陵碑可徵與周之漆沮有邵
比隆去縣治可十數里地名龍爪樹下卽古朱家巷地

今其樹尚在宜封職顯以隆本始 上可其奏下所在
守臣訪求實跡竟莫有據已之

五月詔設興都畱守司統顯陵承天二衛比中都焉建聖
諭碑于承天府榜其城樓曰顯親達孝之城

甲子駕幸大峪召禮部尚書嚴嵩論曰大峪地勢空婁豈
如純德山完美謹奉慈宮南祔于是大峪之役始罷

獻皇后梓宮發京師初 上還自大峪乃定議祔葬獻皇
后于顯陵卜以是月甲申發慈宮往葬承天命禮部尚

書溫仁和等及諸內侍護從由會通河遡舟南去既而
至漢口江沙淺澁有司懼議所以疎通之策適西山大

雨漢水增漲梓宮得順流而下撫臣以聞 上喜曰朕
仰荷天休慈神孔安朕心寧悅

閏七月庚申 獻皇后合葬於顯陵新寢既而勳輔大臣
以神主升祔廟享大禮告成上言奉慰 上曰朕冲昧
稔愆累及父母今者送終禮畢孤惟永慕轉覺不堪卿
等陳慰具悉忠悃但人子之情未盡莫如朕甚奉天勤
民恐亦冒昧卿等其悉心匡朕不逮時少詹事孫承恩
獻 慈孝獻皇后山陵禮成頌一通 上畱覽

十九年二月詔增顯陵陵戶二十名其稜恩殿每年供用
照隆慶殿一體供辦從守備太監傅霖請也工部侍郎

顧璘因上言修顯陵陵宮殿計銀四十六萬兩有奇請
派南直隸浙江江西福建兩淮兩浙鹽司協濟又言承
天大工並興軍夫匠役日食米四百石兼以荒旱不給
宜將借用承天用餘糧南先行支放及漢陽等府所遮南
糧八萬五百餘石悉留接濟詔俱從之

二十七年二月 上以 孝烈皇后陵名未定諭輔臣曰
朕思 太祖 成祖俱是二后先安玄宮其陵名定在
何時可令禮臣查故事以聞禮部尚書費家奏言洪武
十五年九月十三日 孝慈皇后葬孝陵永樂十一年
二月十六日 仁孝皇后葬長陵皆命名在先卜葬在

后載兩朝實錄中於是 上定 孝烈皇后陵名曰永
陵仍御製祝文命成國公朱希忠告太廟

五月 孝烈皇后葬永陵先是 上命后禮與 孝潔皇后
后啓安禮併舉 孝烈居左旣而 上以 孝潔皇后
已久安不宐矣動罷啓安禮至是部臣以玄宮規制請
乃更令 孝烈皇后梓宮入山陵居中之右虛其左云
三十年正月給事中何光裕奉詔清理陵衛軍士因條上
事宐曰廣召補飭營務專官守革占役設險隘定邊戍
祛積弊疏下兵部覆言召募軍士應募者少得用亦難
招得遊食之民復與解來戶丁何異加以軍裝貼銀必

長誣冒之弊建立營室必數千間時方財詘興作不易陵寢根本之地土脈風氣所關添墩築牆未可輕議此三事宜已其餘可行上從部議而營房仍准建立三月上諭輔臣顯陵不異天壽事體當同少文武二人奉守大學士嚴嵩言二聖陵寢所在委宜從重聖慮極當但鳳陽祖陵止內官守備武臣畱守顯陵設官創制蓋准于此天壽文武奉守近因防虜添設事宜省革惟聖明裁之上是其言遂不果

六月禮部左侍郎程文德奉詔相睦妃何氏瑩城因言金山一帶壘地無餘宜與故妃包氏陳氏同窆且二妃之逝已奉聖諭令同一地爲墓又言憲廟諸妃皆同處者且省民力一分仁言惻怛聞者感動今曠域甚廣附造爲便上曰祖宗成法當守王制亦當遵古世婦御妻數俱用九其自今以九妃同墓共一享殿而中爲七室所司如議奉行

三十四年十月掌太常寺徐可成言寺丞王守一祀長陵至昌平知州衛鈿不備鼓樂夫役送迎香帛亭又責械其樂舞生非朝廷重陵寢之意上怒命逮詣京訊治四十二年二月詔修鳳陽祖陵及楊王墳巡撫都御史毛愷等言二墳工費一切取民今地方兵荒大役難于並

舉請命先營祖陵其楊王墳頽壞已久役巨費多請暫罷以俟豐年報可

四十五年十一月重修顯陵稜恩殿成更碑題曰大明睿宗獻皇帝陵先是顯陵明樓碑題曰恭睿獻皇帝之陵十七年始上廟號工部左侍郎顧璘請更題如長陵碑製上報可既而上之至是都督蔣華謂碑題與廟號不合不可示萬世疏請更定乃更今號云

隆慶元年八月上欲躬詣天壽山行秋祭禮大學士徐階以舊制惟太廟躬祀山陵遣官重社稷也不從階反覆言地近東西二虜不可冒險乃止

二年二月丁未上詣天壽山謁諸陵

三年三月南京神宮監太監王采以盜伐孝陵樹木論斬薊州總督劉應節等勘報提督昌平都御史栗永祿所陳二事一山陵重地欲修築墻塼以固封守而風氣所關不便興作宜令內外守備多植樹木以助保障一昌平舊有天壽山守備自移駐守備于灰嶺口以永安營坐營官帶營而本城防禦遂疎宜仍令天壽山守備還駐昌平專防陵寢罷灰嶺口把總改設守備聽居庸關叅將節制兵部覆奏從之

蕭齊天壽山帝自逐魏帝崩于天壽山永安營坐
 不與興卦宜令內衣帝崩於天壽山以世於朝一昌平
 二事一山刻重此始刻樂辭以固其守而風景所關
 蕭世懸替隱飄膏華博城對晉昌平濟嶽史栗禾新刻
 三事一曰南京輔宮溫太溫王采以益封孝刻樹木備神
 二事二曰丁未土請天壽山請刻

太祖高皇帝 孝慈高皇后馬氏葬孝陵 在南京神烈山即鍾山

四十妃嬪惟二妃葬陵之東西餘俱從葬

成祖文皇帝 仁孝文皇后徐氏葬長陵 以下諸陵在昌平天壽山

十六妃俱從葬

仁宗昭皇帝 誠孝昭皇后張氏葬獻陵

七妃三葬金山餘俱從葬

宣宗章皇帝 孝恭章皇后孫氏葬景陵

八妃一葬金山餘俱從葬

英宗睿皇帝 孝莊睿皇后錢氏葬裕陵 以後無從葬者

帝貴妃孝肅皇后周氏 憲宗生母也合葬 恭讓章

皇后胡氏葬金山十八妃一葬綿山餘俱金山

按英宗遺詔皇妃他日宜合葬惠妃亦須遷來以後諸

妃次第附葬今止 睿皇后合葬裕陵諸妃皆葬金山

惠妃尚葬桃山竟無陪葬者

景皇帝 景皇后汪氏葬金山

憲宗純皇帝 孝貞純皇后王氏葬茂陵

帝淑妃孝穆皇后紀氏 孝宗生母也初葬金山 孝

宗卽位遷合葬 帝宸妃孝惠皇后邵氏 獻皇帝生

母也初葬金山 世宗卽位遷合葬 十四妃一葬陵

之西南餘俱葬金山 廢后吳氏葬金山

按憲廟十三妃始同爲一墓嘉靖十三年以古世婦御

妻皆九宜九妃爲一墓同一享殿內作七室兩廂等各

備於是金山預造五墓墓各九數以次葬焉

孝宗敬皇帝 孝康敬皇后張氏葬泰陵

睿宗獻皇帝 慈孝獻皇后蔣氏葬顯陵 在承天純德

山都督蔣華奉祀

武宗毅皇帝 孝靜毅皇后夏氏葬康陵 二妃葬金山

世宗肅皇帝 孝烈肅皇后方氏葬永陵 前后孝潔皇

后陳氏初葬襖兒峪隆慶初遷合葬 繼后張氏葬金

山 孝恪皇后杜氏 穆宗生母也初葬金山隆慶初

遷合葬 二十六嬪惟五妃葬襖兒峪餘俱金山
永陵諸妃陪葬不由隧道列于外垣之內寶山城之外
明樓之前左右相向以次而附


山前新築本城
永陵諸妃陪葬不由隧道列于外垣之內寶山城之外
明樓之前左右相向以次而附

按國有大事遣大臣祭告諸陵天壽山諸陵各置陵衛
神宮監祠祭署如孝陵正旦酒果清明中元冬至聖旦
太牢分遣勳戚大臣祀愍忌太牢專遣勳戚大臣祭承
天顯陵置衛神宮監祠祭署如諸陵祀亦如之

金山又有懷獻太子悼恭太子哀冲莊敬二太子

峪附其母 憲懷太子俱祭以牲醴遣內官行禮惟悼恭

妃墓傍 用素羞哀冲莊敬遣皇親行禮斬獻王越靖王貞惠妃
吳氏滕懷王衛恭王貞烈妃楊氏許悼王秀懷王妃黃
氏忻穆王岐惠王妃王氏雍靖王妃吳氏壽定王妃徐
氏繼妃吳氏汝安王妃李氏次妃晉氏涇簡王妃曹氏



申懿王妃項氏蔚悼王景恭王頽傷王戚懷王薊哀王

均思王靖悼王

惟斬滕二王葬綿山雍申
二王葬蘭山餘俱金山

祭以牲醴及

諸殤公主諸阿保夫人祭以素羞

惟永清公
主用牲醴

俱遣內官

行禮又郢靖王梁莊王岳懷王常寧善化二長公主葬

承天又國初追封壽春王妃劉氏霍丘王妃翟氏下蔡

王安豐王妃趙氏蒙城王妃田氏寶應王六安王來安

王都梁王英山王俱葬鳳陽西北二十五里地名白塔

南昌王妃王氏盱眙王妃唐氏臨淮王妃劉氏山陽王

招信王俱附葬鳳陽皇陵咸以時祀諸王葬其封國者

其子孫祀之外戚楊王墳在盱眙設祠祭署奉祀陳氏

墳戶二百一十家徐王墳在宿州設祠祭署奉祀祀丞

皆武氏墳戶九十三家滁陽王墳在滁州廟首宥氏墳

戶十九家皆歲時祭祀

才女又區初追封壽春王妃劉氏在位王妃翟氏下
 王安豐王妃趙氏蒙城王妃田氏齊應王六安王米
 王都梁王英山王俱葬鳳陽縣北二十五里地名有
 山古武津習燕神祭也死唐武陽王妃劉氏山陽王
 皆為元朝兵此十三家無則王良并無限首官其
 復元三百一十宋翁王世并帝限籍歸祭器奉御也

